

Upernavimmi nunaqarfinilu katersuunnermut killilersuutit pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi §§ 6, 6 a, 12 b aamma § 29, imm. 2 aamma 3 naapertorlugit uku aalajangersarneqarput:

Atuuffia

§ 1. Nalunaarut una Avannaata Kommuniani nunaqarfinni ukunani atuutissaaq:

- 1) Tasiusaq.
- 2) Upernavik Kujalleq.
- 3) Nutaarmiut.
- 4) Nuussuaq.
- 5) Innaarsuit.
- 6) Naajaat.
- 7) Aappilattoq.
- 8) Kangersuatsiaq.
- 9) Kullorsuaq.

Imm. 2. Nalunaarut Kalaallit Nunaanni Peqqinnissaqarfimmut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaannermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

Imm. 3. Nalunaarut katersuunnernut, politikikkut allatulluunniit isummersornissamik sunniiniarnissamik siunertalinnut atuutinngilaq.

Imm. 4. Nalunaarut eqqartuussivinnut atuutinngilaq.

Imm. 5. Nalunaarut namminersortunut pisortaniillu ulluunerani neqeroorutitut, atuarfinnut, ilinniarfeqarfinnut il.il. nappaatit tunillaassortut akiorniarlugit iliuutsit pillugit Inatsisartut peqqussutaanni § 22 naapertorlugu atuutsinngilaq.

Imm. 6. Nunatsinni Nakorsaaneqarfik nalunaarummit immikkut akuersissuteqarsinnaavoq.

§ 2. Nalunaarummi matumani aalajangersakkat ilaat tamarmilluunniit inunnut inuiaqatigiinnut pingaarutilimmik sulialinnut atuutsinneqassanngitsut aalajangerneqarsinnaavoq.

Imm. 2. Inunnut Kalaallit Nunaanni Politiini sulisunut Kalaallit Nunaanni Politimesteri imm. 1 naapertorlugu aalajangiisassaaq.

Imm. 3. Inunnut Issittumi Sakkutooqarfimmi tassanilu immikkoortorta qarfinni sulisunut Issittumi Sakkutooqarfimmi pisortaasoq imm. 1 naapertorlugu aalajangiisassaaq.

Imm. 4. Inunnut Peqqinnissaqarfimmi sulisunut Nunatta Nakorsaaneqarfia imm. 1 naapertorlugu aalajangiisassaaq.

Imm. 5. Inunnut imm. 2-4-mi taaneqanngitsuni sulisunut, Nunatta Nakorsaaneqarfia imm. 1 naapertorlugu aalajangiisassaaq. Tamatuma saniatigut Nunatta Nakorsaaneqarfia qinnuteqarnikkut inunnut inuiaqatigiinnut pingaarutilimmik suliaqanngitsunut immikkut akuersissuteqarsinnaavoq.

Katersuunnernut il.il. tunngatillugu killilersuinerit

§ 3. Aaqqissuussanut, nalliuttorsiornermut, sammisaqartitsinerit assigisaanulluunniit inuit 20-t qaangerlugit peqataaffigineqartunut ingerlatsinissaq peqataanissarlut inerteqqutaavoq. Inerteqquteqartitsinerim ilaatinneqarput illup iluani, silami, pisortat inuillu katerittarnerat, aaqqissuussinerit pisussallu il.il.

Imm. 2. Peqataasut taamaallaat inoqutigiiuppata imm. 1 inissiamut atuutissanngilaq.

§ 4. Politiit § 3-mi inerteqquteqartitsinerup eqqortinniarnissaanut nakkutiginninnissaq siunertaralugu ininut sumiiffinnullu allanut eqqartuussivik akuersiseqqaarnagu isersinnaapput.

Imm. 2. Inissiaq imm. 1-mi ilaatinneqanngilaq.

Pineqaatissiissutit

§ 5. § 3, imm.1-mik unioqquutitsisoq Pinerluttulerinermik Inatsit naapertorlugu pineqaatissinneqarsinnaavoq.

Imm. 2. Ingerlatseqatigiiffiit il.il. (inatsisitigut pisussaataasut pisinnaatitaasullu) pinerluttulerinermik inatsimmi kapitali 5-mi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilersitsineq aamma atuunneranut piffissaliussaq

§ 6. Nalunaarut ullormi 25. november 2021-mi nal. 18:00 atuutilissaaq.

Imm. 2. Nalunaarut malillugu killilersuinerit, inerteqqutit, peqqusinerit il.il. 8. december 2021 tikillugu atuutissapput.

Namminersorlutik Oqartussat, ulloq 25. november 2021

Kirsten Fencker sinnerlugu

Pele Broberg

Inuussutissarsiornermut Niuernermullu Naalakkersuisoq

/ Aka Olesen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut